

Sewa Zaza TV rê, Duisburg de

Memed Karer

Dêrsım ra

Ma ve xêri biraêne, waêne!

Sıfte sıma rê hardê Dêrsımı ra, hardê pi u khalku ra sılamê ho rusnon. Ez t'a ra ve uza nêşkiun biêrine cokaro sıma rê na xete rusnon. Haq sıma ra rajı vo, sımaê ke zonê ho ra, qomê ho ra has kenê, na ruval ra amê têhet projia Zaza TVy sero qesey kenê, lawıkunê ho vanê. Ez na xevere rê zof biune sa, sabiaene çıka, perri nişti mına. Delğê mı her waxt zonê ma seroo, gosê mı karê sıma seroo, van ala seveta zonê ma qe karo de rınd nêbeno, qe xevera de xêre nêvejina?

Çıturi ke sıma ki zonenê, merdena zu zoni merdena zu qomia. Zu qom, zu milet werte ra wedardene rê hire ray estê.

Zu dismen:

1. eve ordiyê ho, eve ç'ekunê ho kuno hardê zu miletı, i miletı qır keno heni werte ra dano we.
2. zonê i miletı keno tomete, zuyo ke qesey bıkerı ki ceza dano cı, zonê ho eve zora cı salıx dano eve u tore werte ra dano we.
3. ya ki cêncê zu miletı kunê binê teşirê zon u kulturê zovına zu miletı, zon u kulturê ho caverdanê, kunê ra zon u kulturê zovına zu miletı dıma, zonê ho qesey nêkenê zonê i miletı qesey kenê, lawıkunê ho nêvanê lawıkunê i miletı vanê, heni eve ho deştia ho werte ra danê we.

Sıma ki zonenê ke, serto corêno vırên miletê ma sero cerevno. Vatena zu apê de Demenji ra gore, vato ke 'ma jêde qır kerdi na çağılê binio mendo, na çağılê bini endi t'oay rê nêbeno, ey ke qır mekerime ki beno'. Dıma sertê diino corên miletê ma sero cerevno. Yanê mektevê ho nê ro, domonê ma berdê eve zora zonê ho cı salıx do. Oncia ki ma vindi nêbime, hama ameyme şındorê vindibiaene. Cêncê ma ki, çıturi ke sıma ki vinenê, leto zu zon u kulturê ho ra koto düri, koto ra zonê sari dıma.

Vanê mordemê berdo lingi gire dê do ve pıro, mordemeki vato ax p'oştia mı, ax p'oştia mı. Vato yaw ma dame lingunê ney ro, nu ça vano ax p'oştia mı, ax p'oştia mı, nu ça nia vano? Cı ra pers kenê, vano p'oştia mı ke bıviyêne sıma nia mı ro nêdêne. Eke yê ma ki zu televizonê de ma bıviyêne, p'oştia ma bıyêne qaim.

Raştia Haq ano hurê, rozê televizon de zonê ho de xeveru, zonê ho de lawıku gosdame, zonê ho de filımu şêr keme? Hata roza ewroene ters u xofê dewlete ma sero viyo. Vanê rozê mordemê gozırıye cınıta, şiyê gerre kerdo, do ve mekeme vato ney zonê ho de gozırıye cınıta. Oncia rozê çenekê mali de kemere kuya bize ra, tersu ra eve Tırki veng kerdo ro cı, vato 'keçi keçi sana diyorum buraya gel'; vato 'ez ke zonê ma de veng ro cı kerine nêvo ke şêrê maylımi de gerrê mı bıkerê'.

Haq ano hurê oncia peyser some dewunê ho, oncia eve zonê huyo rındek veng keme ro mali, eve zonê huyo rındek kergu waneme vame 'Cü, cü cü, qut, qut, qut!' qut dame kergu, eve zonê huyo rındek sewunê zimustoni de, sewunê dergu de sankunê ho oncia vame? Eke televizonê de ma ronıyo, eke zonê ma mektevu kuyo heni inam kon ke ni pêro oncia jê vırêni benê. Çıturi ke kamılê ma vanê: 'Haq sola sevevu rê nêverdo, ma kerdime bêpage, kerdime bêhêga, kerdime bêmezele ameyme suku de erjiayme pêser, t'a suku de bime pêrsani. Rozê ke bımırime kes meitê ma ki wenêdano'.

Çı rınd ke sıma estê, nu ma rê diyağo. Haq t'oa ve dest-paunê sıma, t'oa ve vengê sıma nêkero, projia sıma qomê ma rê ve xêre vo.

Oncia sılamunê ho sıma rê van, bımanê weşiye de.